

# Brevs, pacs e gasettas duain arrivar fin mezdi

Distribuir ad uras la posta, pretenda ina moziun da Martin Candinas

■ (anr/vi) **La posta duai reparter dapertut las gasettas fin mezdi. Martin Candinas pretenda quai en in'intervenziun inoltrada en questa sessiun. Il cusseglier naziunal tutga cun quai il problem ch'era La Quotidiana ha. Gist ustiers recloman savens che la gasetta vegnia memia tard.** Tgi che legia la gasetta fa quai per il solit avantmezdi. Per in lectur che abitescha en ina regiun senza distribuziun da la damaun èsi stentus sch'el survegn sia gasetta pir suenter solver. Arriva la gasetta forsa pir suenter gentar èn tshertas novitads ch'ils schurnalists han redegì la saira avant gia pupè café froid. Era per La Quotidiana è quai in problem: Gist ustiers recloman savens ch'ils giasts legessian gugent la gasetta rumantscha durant il café da las nov. Ma en pliras vischnancas arriva ella pir pli tard. Candinas tutga la noda cun sia nova moziun.

## Fin mezdi en tuttas chasadas

«Il cussegl federal vegn supplitgà dad adaptar las disposiziuns legalas uschia che la posta vegn da principi distribuida fin mezdi en tuttas chasadas sch'i na vegn betg purchì ina distribuziun da la damaun en ina regiun», stat scrit en la moziun. Ozendi na saja betg reglè da tge uras che la posta haja dad esser repartida. Cuzunt en la periferia arrivia la posta adina pli tard. «Quai è dischavantagius per l'economia locala, ma era per la clientella pertutgada.»

La posta stoppia arrivar ad uras cuzunt per la gliued che communitgeschia anc senza e-mail, facebook e twitter. Tala gliued saja avisada da survegnir brevs u pacs urgents anc avantmezdi. «Ina gasetta che n'arriva betg fin mezdi n'è betg pli avunda actuala e perda sia valor per il lectur», argumentescha Candinas.

## Impurtant per firmas

Ils ultims onns hajan ins serrà adina dapli postas ed uschia sajan svanids ils caums postals. La consequenza saja che firmas stoppian ir adina pli lunsch per svidar il caum u ch'ellas stoppian spetgar ditg sin la posta. «Sch'ellas pudessan sa fidar che la posta vegn distribuida fin mezdi, fiss quai in cler levgiament», stat scrit en la moziun.

Anc avant paucs onns haja la posta reparti brevs, pacs e gasettas fin las 12.30. Deplorablament saja la posta s'allontanada da questa pratica ed empermettia ina distribuziun «per regla baud l'avantmezdi». «Las Svizras ed ils Svizzers spetgan in service public che merita quest num», admonescha Candinas. Era la posta duai porscher ina plivalur vesibla per ch'ella giaudia vinavant in tractament favorisant entras il parlament.